



Instrución 1/2020 da Secretaría Xeral de Universidades e da Axencia Galega de Investigación para iniciar o procedemento de avaliación do rendemento do persoal investigador pendente de avaliación contratado ao abeiro do programa de apoio á etapa de formación posdoutoral, modalidade A, para o ano 2016.

A Orde do 18 de febreiro de 2016 (DOG núm. 44, do 4 de marzo de 2016), establece as bases para a concesión, en réxime de concorrencia competitiva, das axudas de apoio á etapa de formación posdoutoral nas universidades do SUG, nos organismos públicos de investigación de Galicia e noutras entidades do Sistema galego de I+D+i. O anexo I da citada orde está dedicado a regular a modalidade A destas axudas e establece no seu artigo 6 que ao finalizar o contrato as persoas contratadas serán sometidas a unha avaliación da actividade investigadora desenvolvida.

Esta avaliación foi iniciada pola Instrución 1/2019, da Secretaría Xeral de Universidades e da Axencia Galega de Innovación, e o resultado foi recollido na Resolución do 1 de agosto de 2019. Porén, hai persoas investigadoras que non foron sometidas a esta avaliación por non ter finalizado o contrato debido a baixas e permisos de maternidade, polo que se dá comezo ao seu proceso de avaliación a través desta instrución.

Este proceso realizarase a partir da documentación que se lles require ás persoas investigadoras que foron contratadas ao abeiro da citada orde polas universidades do SUG e polas demais entidades indicadas no artigo 2, para que presenten e sometan o seu currículo á avaliación por comités avaliadores externos.

De acordo co Decreto 138/2018, do 8 de novembro, polo que se establece a estrutura orgánica da Consellería de Educación, Universidade e Formación Profesional, correspóndelle á Secretaría Xeral de Universidades contribuir á ordenación e á complementariedade das capacidades investigadoras do SUG, seguindo criterios de excelencia e consolidación no ámbito dos obxectivos que establezan os plans do Goberno galego en materia de investigación e innovación.

De acordo co Decreto 135/2017, do 28 de decembro, polo que se establece a estrutura orgánica da Consellería de Economía, Emprego e Industria e co Decreto 50/2012, de 12 de xaneiro, polo que se crea a Axencia Galega de Innovación e se aproban os seus estatutos, correspóndelle á Axencia Galega de Innovación (Gain) definir e desenvolver políticas públicas dirixidas á captación e xestión do talento que permitan, no seu conxunto, incrementar o rendemento innovador das empresas e do Sistema Galego de Innovación.

Co fin de harmonizar o exercicio das competencias que en materia de I+D+i teñen atribuídas a Secretaría Xeral de Universidades da Consellería de Educación, Universidade e Formación Profesional e a Axencia Galega de Innovación da Consellería de Economía, Emprego e Industria, e na procura de sinerxías, considérase de interese a realización de convocatorias conxuntas que axuden a consolidar un sistema de I+D+i suficientemente sólido como para garantir o desenvolvemento social e a competitividade económica.

En consecuencia, o secretario xeral de Universidades e a directora da Gain no uso das competencias que temos atribuídas, ditamos a seguinte instrución:

1. Iniciar o procedemento que permita a avaliación establecida no artigo 6 do anexo I da Orde do 18 de febreiro de 2016 das persoas investigadoras contratadas no Programa de apoio á etapa de formación posdoutoral, modalidade A, da convocatoria de 2016, que finalizaron o seu contrato posdoutoral A da convocatoria de 2016 e que aínda non foron avaliadas.

2.- A avaliación levarase a cabo (baixo os principios xerais de obxectividade, independencia e calidade das avaliacións) por expertos de fóra do SUG, coa colaboración da Axencia para a calidade do sistema universitario de Galicia (ACSUG), a partir da documentación facilitada polas persoas interesadas e de acordo cos criterios e documentación sinalados nos puntos 4 e 5 desta instrución.





Toda a documentación e os méritos que se acheguen teñen que ter data igual ou anterior á finalización do contrato posdoutoral A da convocatoria de 2016. Non serán tidos en conta ningún mérito nin datos contidos no CV que sexan posteriores á data de finalización deste contrato.

3. Neste proceso, as comisións de avaliación terán como referencia os criterios de avaliación establecidos na Resolución do 20 de xullo de 2005, da Secretaría de Estado de Universidades e Investigación, pola que se establecen os criterios de avaliación no Programa de incentivación da incorporación e intensificación da actividade investigadora (BOE nº 204, do 26 de agosto), en particular aqueles sinalados no seu anexo I (criterios de avaliación relativos ao conxunto da traxectoria investigadora, sen excluír ningún ano de actividade).

4. Requirirles ás persoas interesadas a documentación necesaria para a avaliación do programa, na que se reflectirán os datos necesarios para avaliar o conxunto da traxectoria científico-tecnolóxica. Esta documentación, dirixida á Secretaría Xeral de Universidades no caso das persoas contratadas por unha universidade do SUG e á Gain nos demais casos, deberá ser presentada polas entidades contratantes a través da sede electrónica da Xunta de Galicia, por medio do procedemento PR004A. A documentación terá que remitirse **antes do 31 de maio de 2020**.

5. A documentación terá que abranguer os seguintes aspectos:

- 5.1.- Currículo actualizado nun modelo normalizado (formato pdf), acompañado dos documentos xustificativos dos méritos alegados no currículo. Incluírase así mesmo un breve resumo sobre a relevancia das publicacións realizadas requirido no punto 2.g do anexo I da Resolución do 20 de xullo de 2005. O currículo complementarase cun documento índice de cada un dos méritos alegados e xustificados que permita unha doada identificación de cada un deles.
- 5.2.- Capacidade da persoa investigadora para liderar grupos de investigación, liñas de traballo ou de obter financiamento en convocatorias públicas competitivas das administracións públicas ou entidades privadas sen ánimo de lucro, sinalando ademais os resultados do grupo investigador que dirixe.
- 5.3.- Patentes en explotación, destacando especialmente a extensión da protección da patente nacional, europea ou polo Tratado de cooperación de patentes (PCT).
- 5.4.- Actividade formativa da persoa avaliada, en especial a relacionada coa formación de doutores e a dirección de teses de doutoramento.

6. Acadarase unha avaliación positiva final cando se cumpran os criterios mínimos fixados no anexo I da citada Resolución de 20 de xullo de 2005, referida ao conxunto da traxectoria investigadora, sen exceptuar ningún ano de actividade. Non poderán obter unha avaliación positiva as persoas investigadoras que renuncien ao contrato antes da súa finalización. No caso de que a avaliación sexa positiva, a Secretaría Xeral de Universidades ou a Gain, segundo corresponda, emitirán a correspondente acreditación de ter superado con aproveitamento o programa.

As exixencias establecidas poderán ser moduladas nun determinado ámbito no que así se xustifique por proposta da comisión de avaliación, que mesmo poderá variar o número de achegas necesarias para merecer a avaliación positiva.

Santiago de Compostela

O secretario xeral de Universidades
José Alberto Díez de Castro

A directora da Axencia Galega de Innovación
Patricia Argerey Vilar

